

20/07/1998

PM lancar Dana Buku Kebangsaan Ogos

JERANTUT, Ahad - Perdana Menteri, Datuk Seri Dr Mahathir Mohamad, akan melancarkan Dana Buku Kebangsaan pada 5 Ogos ini, yang akan mengumpul buku untuk disalurkan ke perpustakaan desa di seluruh negara.

Usaha mewujudkan dana itu akan dilaksanakan dengan kerjasama Petronas dan Pos Malaysia yang akan menjadikan stesen minyak Petronas serta pejabat pos di seluruh negara sebagai pusat pengumpulan buku itu.

Sehubungan itu, orang ramai diminta memberikan sumbangan buku sama ada yang terpakai atau yang baru untuk dimanfaatkan oleh masyarakat desa menerusi dana berkenaan.

Menteri Pembangunan Luar Bandar, Datuk Annuar Musa, berkata penubuhan dana berkenaan diharap dapat membantu kerajaan mewujudkan sekurang-kurangnya 1,000 pusat bacaan di seluruh negara.

"Selepas pelancaran itu nanti, orang ramai boleh memberi sumbangan buku, sama ada terpakai atau baru di stesen minyak yang dikenal pasti serta semua pejabat pos.

"Kita mengambil daya usaha itu kerana perpustakaan desa dan pusat bacaan yang ada di seluruh negara cuma 198 buah," katanya kepada pemberita selepas pelancaran Kampung Angkat Desa Wawasan Pergerakan Wanita Umno, Kampung Teh dan Batu Embun di sini, hari ini.

Menurutnya, kerajaan akan menggunakan pendekatan yang fleksibel, iaitu mewujudkan pusat bacaan di madrasah, masjid, kedai kopi, balai penghulu, selain pusat bacaan rasmi.

"Melalui program itu, budaya kampung dapat diubah kepada budaya yang lebih positif kerana ia adalah aspek penting dalam membina ketahanan nasional dan pembangunan luar bandar," katanya.

Selain itu, katanya, kementerian melalui Jabatan Kemajuan Masyarakat (Kemas) akan mewujudkan sekurang-kurangnya satu pusat pembelajaran komputer di setiap negeri.

(END)